

Hammi caashaq iyo hungo been ah Q3AAD W/Q: Cabdisalaam Macalin Xirsi



Hammi caashaq iyo hungo been ah Q3AAD Axmed oo digtoonaan iyo diyaargarowba ugu jiray , maqalka dhawaqa telefoon kaga yimaadda dhanka gacalisadiisa Nasro ayaa taleefoonkiisa oo miis dulyaalay gacanta ku laalay oo kor ugu soo qaaday ,asaga oo hubsanaaya, indhihiisana si miyir leh ugu eegaya, foojignaana u dhugganaya maggaca qofka soo wacay, ayaa taleefoonkii barta cagaaran taabsaday, kaddib markuu xaqiiqsaday hubsadayna in qofka soo wacayaa yahay Nasro, taleefoonkiina waxa uu usoo jiiday dhanka dhegtiisu ka xigtay, ilaa uu taleefoonkii soo gaarsiiyayay dhegtiisa kuna nabay dhabankiisa ,iskuna diyaariyay in uu dhegaysto maqalka codka Nasro ayaa halmar neefsaday.Intaas kaddib Nasro oo huufsan degdegsan, codkana googoyaysa ayaa hadal kaga bilowday:Hello? Axmed may maqlaysaa. Asaga oo codka hoos u dhigaaya naxariistii ay marwalba uga baratana ku laraaya , dareensiinaayana in uu maqlaayo ayaa ku yiri; gacaliso waan ku maqlaa ee soo dhowoow.Nasro oo aan galabta tan aan qorsha ku soo darsan marnaba in ay Axmed la hadasho rabtana in ay ka miro dhaliso hadafkii ay u soo wacday, oo ahaa in ay is barto axmed iyo Najma ayaa ku tiri: Axmed qaali waxaan filayaa in aad diyaar u tahay in aan iskiin baro saaxiibaday, Axmed oo faraxad muujinaaya balantii uu gacalisadiisa ka qaadanaya fulainaaya raali ahaanshana ay ka muuqato, ayaa ugu jawaabaya macaan diyaarbaan u ahay weliba si dhammaystiran.Nasra oo qoslaysa Axmedna ku adkaynaysa in uu saaxiibadeed si wacan oo mug iyo miisaan leh u soo dhoweeyo sidoo kale Najmana maqashiinaysa in diyaar loo yahay, ayaa ku tiri Axmed haye hoo la hadal soona dhowee Najma waa gacantaydii midig .Axmed oo xushmad iyo qadarin dheeraad ah laga fahmaayo hadalkiisa ayaa ku yidhi: Nasro waa waajib in aan soo dhowweeyaa saaxiibada iyo qof kasta oo dhankaaga ka yimaad.Nasro taleefoonkii waa iska wareejisay waxayna ku hubsatay midigta Najma, waxaana kala wareegatay Najma, Najma ayaa si haneed leh u qabsatay telefoonki iyadoo aad moodo inay u diyaargarowbeyso dhegaysiga warbixin xiisa badan, ayay u dhaweysa dhegteeda midig, kuna xajisay ayada oo ay ka muuqato inay taleefoonka hammuun gaar ah u hayso, waxayna si kedis ah u sifaysatay dhuunta iskuna diyaaraysay in ay kaga horrayso hadalka Axmed, booskii saaxiibadeedna bedesho, ayaa hadalkeedii xabeebta iyo naqasku ku badnaa ku bilowday Axmed: ?Asalaamu calaykum walaal.?Axmed oo tusaaya gabarta soo dhowayn iyo xurmo gaar ah ayaa ugu jawaabay, jawaabtii lamma dhaafaanka ahayd ee laysla yaqiinay kuna yii wacalaykumu salaam walaal Najma see tahay??Najma ayaa ku tiri: Walaal waan ladanahay ee adigu see tahay, si hufan oo xushmad leh ayaa laysu weydaarsadey erayo u gogol xaaraya barashada iyo soo dhaweyn qalbi furan.Isbariidin iyo is xog waraysi xaga caafimaadka ah iyo wixii marka qof walba ku sugnaa,kaddib ayuu Axmed ku yiri : Najma waan ku faraxsanahay in aan ku bartee soo dhowoow walaashay.Najma ayaa ayaduna markaas la soo booday anba Axmadow aad baan ugu faraxsanahay in aan ku barto farxadaydana lama soo koobi karo, in badana waan jeclaa inaan ku barto iimase suura geline, dhibsa malahoo malaha galabtay qorneed in aan is baranee bal si fiican oo qota dheer isku kay bar si fiicana iigu warran walaalkay iyo dumaashigey qaaliiyow hana iga xishoon walaasha ayaan ahaye adiga iyo Nasrana waan idin dhaxeeyaayoo midna lama jiree.Axmed oo raagsanayaa goorta ay su'aalaha Najmo ay dhammaan doonanan warcelinta waydiimaheedana soo gaagaabinaaya dhanka kale soo dhowayn dareensiinaaya madaama axmed yahay nin aad ugu fiican soo dhowaynta dadka ahna nin firfircooni iyo furfurnaantaba u dhashay galabtana aysan ugu horrayn qof lays baro ee uu soo dhoweeyo, balse galabta soo dhowayntiisu ay ka gadisantahay soo dhowaymihii hore.Galabta qofkii aad ugu fiirsadaa waxa uu ka dhex dareemayaa soo dhowayntiisa iska caabbin iyo diidmo uu diidaayo in hadalka lagu badiyo,sidoo kale in uusan rabbin in uu

Najma isku furfuro, sababtoo ah isbarashadii qotada dheereed ee Najma ka rabatay waxa uu ku soo koobay waxay horay u ogeed, hadalka asagoon badina waxa uu yiri: Walaashey ani magacayga waad taqaana sidaan filaayayo meeshaan joogana in ay Nasra kuu sheegatay ayaan u malaynayaa haddii aysan kuu sheegina aniga ayaa hadda kuu sheegaaya oo waxaan joogaa dalka Koonfur Afrika gaar ahaan magaalada **cope town**. Najma ayadu dhankeeda xishood iyo dabacsanaan ayay muujinaysaa mana dareemayso in Axmed hadalka soo koo koobayo howl ay Nasra u dirtana way qabanaysaa mana rabto in ay taleefonka ka baxdo ilaa ay ninkaan gun iyo baar ka ogaato, arrinkeedu waa imtixaan iyo tijaabo ay ka qadayso Axmed, balse, si habsami leh oo ilbaxnimo ku jirto ay hadba dhan uga wareegeysa, iyadoo weydiineysa, ma keligaaba meesha jooga? Reerkiina intii kale aaway? Hadba jawaabta uu bixiyo ayay su'aal kale ka dhex sameyneysaa sidii dambibaarayaasha. Axmed isagu lama socdo tabaaska iyo weydiinta badan, balse, horeba wuxuu ugu jirey is xakameyn. Nasri eray walba oo Axmed yiraa sida hilibka ayay saafeysa oo kala dhigeysa, tankale Najmo waayo aragnimo badan ayay u leedahay arrimaahan si fiicana waa u taqaanaa sida dhaliilaha ragga loo baaro, waana sababta ay Nasro u wakiilatay, in badan ayay gabdho rag ka reebtay una sheegtay in uusan anfacayn, sidoo kale in badan ayay ku dhiiri gelisay kuwa kale in ay ku fara adeegaan ragga ay hadda gacanta ku hayaan waxaa la dhihi karaa waa roon oo daran, waa dacar iyo malab, ama qaraar iyo macaan meel ku wada yaal Najmo, oo marba kay doonto kugula dhaqmi. Najma markaan waxaan doorbidaysa in ay Axmed u sheegto in in ay si gaar ah taleefoonkeeda marwalba uga soo wici doonto, mar walbana ay la soo xariirayso, waxayna ku tiri: ?Aboowe waan kula soo xariiraya numberkaagana Nasro ayaan ka qaadanayaa ee hadda la hadal Nasro ayaa il kulul igu soo eegaysa maanta dham e, waana ka baxday Najmo qadka waxaa soo gashay Nasra oo codkeedii naxariista badnaa iyo erayadii macaana ee ay qalbiga Axmed ku hanatay iska soo horaysiinaysa.?????????.La soco qaybaha kale.W/Q: Cabdisalaam Macalin Xirsi